



REPUBLIKA E SHQIPËRISË
ENTI RREGULLATOR I ENERGJISË

BORDI

VENDIM

Nr. 06, Datë 15.01.2021

MBI

KËRKESËN E SHOQËRISË ALBGAZ PËR SHTYRJEN E AFATEVE TË PËRCAKTUARA NË RREGULLOREN E KRITEREVE STANDARDE DHE KËRKESAVE MINIMALE TË CILËSISË SË SHËRBIMIT DHE FURNIZIMIT TË RRJETEVE TË GAZIT NATYROR, MIRATUAR ME VENDIMIN E BORDIT TË ERE NR.100/2019”.

Në zbatim të nenit 16, të ligjit nr.43/2015 “Për sektorin e energjisë elektrike”, i ndryshuar; nenit 16, të ligjit nr. 102/2015 “Për sektorin e gazit natyror”, i ndryshuar, nenit 113, pika 1 dhe 3 e Ligjit nr. 44/2015 “Kodi i Procedurës Administrative” si dhe nenit 26 të “Rregullave të organizimit, funksionimit dhe procedurave të ERE-s”, miratuar me Vendimin e bordit të ERE-s, nr. 96, datë 17.06.2016, Bordi i Entit Rregullator të Energjisë (ERE) në mbledhjen e tij të datës 15.01.2021, mbasi shqyrtoi relacionin e përgatitur nga Drejtoria e Mbrojtjes së konsumatorit, performancës dhe standarteve me nr.143/3 prot date 30.12.2020, në lidhje të kërkesës së shoqërisë Albgaz sha., për shtyrjen e afateve të përcaktuara në rregulloren e kritereve standarde dhe kërkesave minimale të cilësisë së shërbimit dhe furnizimit të rrjeteve të gazit natyror, miratuar me vendimin e bordit të ERE nr.100/2019.

Konstatohet se:

- Me Vendimin e Bordit të ERE-s Nr. 100, datë 21.06.2019, është miratuar Rregullorja për përcaktimin e standarteve dhe kërkesave minimale të cilësisë së shërbimit dhe furnizimit në sektorin e gazit natyror.
- Në nenin 5.2 të kësaj Rregulloreje është parashikuar që; *brenda një viti nga hyrja në fuqi e kësaj Rregulloreje, por jo më vonë se muaj Janar 2021, OSSh-G, OST-G dhe çdo i Licencuar tjetër përkatës do të ndërtojnë mjetet e përshtatshme duke përfshirë edhe mbi bazë IT (teknologji informacioni), të aftë për të regjistruar dhe për të mundësuar aksesin në të dhënat aktuale dhe ato historike të QPI-së.*
- Nisur nga parashikimet e sa më sipër, ERE me anë të shkresës nr.1237 prot datë 16.12.2020, ju drejtua shoqërisë Albgaz sha me kërkesën për informacion në lidhje me masat e marra nga ana e kësaj shoqërie për plotësimin e kushteve të parashikuara në dispozitën e sipër cituar të Rregullores për përcaktimin e standarteve dhe kërkesave minimale të cilësisë së shërbimit dhe furnizimit në sektorin e gazit natyror.

- Në përgjigje të kërkesës së ERE për informacion, në datë 28.12.2020 është paraqitur në ERE përgjigja e shoqërisë ALBGAZ sh.a me nr 211 prot, e cila mes të tjerave kërkon nga ERE shtyrjen e afateve të plotësimit të kushtit që rrjedh si detyrim i nenit 5.2 të kësaj rregulloreje deri në 21/06/2021.
- Albgaz sha argumenton këtë kërkesë duke shpjeguar se, duke marrë shkas nga kompleksiteti dhe diversiteti i objektit të kësaj rregullore, sugjeron që në vitin e ardhshëm 2021, nën drejtimin e ERE, të krijohen kushte për zhvillimin e konsultimeve me palët subjekt të Rregullores (Vendim nr. 100/2019), duke synuar kështu krijimin e një platforme teknologjike të përshtatshme që kontribuon në zbatimin e përpiktë të standardeve të furnizimit dhe ofrimit të shërbimit.
- Albgaz sha bën me dije se, për arsye të pezullimit apo shtyrjes së projekteve të infrastrukturës së gazit, shtyrja e investimeve për ndërtimin apo rehabilitimin e infrastrukturës së nevojshme i dedikohet në masë të madhe efektit të pandemisë Covid-19, i cili është përtej vullnetit të mirë të shoqërisë Albgaz sha në drejtim të implementimit të detyrimeve që burojnë nga kjo rregullore.
- Kërkesa e shoqërisë Albgaz sha për shtyrje të afateve të parashikuara në vendimin e bordit të ERE nr.100/2019 me të cilin është miratuar Rregullorja për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror, është përcjellë në ERE përpara përfundimit të afateve të parashikuara në nenin 5.2 të këtij akti.
- Në kuptimin formal të kësaj kërkesë, rezulton se ajo është përcjellë brenda afateve ligjore të përcaktuara në vendimin e bordit të ERE.
- Sa i përket pales që paraqet këtë kërkesë, vlerësojmë se ajo legjitimohet në kuptim të parashikimeve të vendimit të bordit të ERE nr.100/2019 për të paraqitur në ERE një kërkesë për shtyrje të afateve të parashikuara në Rregulloren për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror, në cilësinë e palës së përfshirë në procedurë.
- Shpjegimet e dhëna nga shoqëria Albgaz sha në lidhje me pamundësinë objektive për të përmbushur kushtet e vendosura në nenin 5.2 të Rregullores për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror, janë të arsyeshme.

Për gjithë sa më sipër, bordi i ERE-s,

VENDOSI:

1. Miratimin e kërkesës së shoqërisë Albgaz sh.a., për ndryshimin e afateve të parashikuara në nenin 5 pika 2 të Rregullores për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror, miratuar me vendimin e bordit të ERE nr.100/2019 si më poshtë:

Jo më vonë se 21.06.2021, OSSh-G, OST-G dhe çdo i Licencuar tjetër përkatës do të ndërtojnë mjetet e përshtatshme duke përfshirë edhe mbi bazë IT (teknologji informacioni), të aftë për të regjistruar dhe për të mundësuar aksesin në të dhënat aktuale dhe ato historike të QPI-së.

2. Drejtoria e Mbrojtjes së Konsumatorit, Performancës dhe Standarteve, të njoftojë palët e interesit për vendimin e Bordit të ERE-s.

Ky vendim hyn në fuqi në 01.01.2021

Për këtë vendim mund të kërkohet rishikim brënda 7 ditëve kalendarike si dhe mund të bëhet ankim në Gjykatën Administrative Tiranë, brënda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.